

Hainbat gazte eta ikasle elkartek esku hartuko dute Euskal Ikasleon III. Nazio Biltzarrean

IA, Euskal Adarra, Duina, IEHIE, Jarrai eta '7 Baietz' han izango dira, besteak beste

I. Petxarroman / Donostia

Hainbat gazte eta ikasle erakundek Euskal Ikasleon III. Nazio Biltzarrean parte hartzeko deia egin zuten atzo. Biltzarra hiru egunez egingo da, Agurainen, Araban. Han, besteak beste, egoera berrian irakaskuntza nola euskaldun daitekeen aztertuko dute ikasleek.

JOANA ETXEBARRIA IAKO ki-deak azaldu zuenez, Euskal Herriak irakaskuntza eredu propioa behar du, «euskalduna eta atzerriar edukirik gabea». IAKO ordezkariak gogoratu zuen Euskal Herriak egun bizi duen egoera politiko berrian eraikuntza lanak «garantzi funtsezkoa» duela arlo eta gune guztietan.

Irakaskuntza eredu propioak bi oinarri izan behar dituela azaldu zuen Etxebarriak: euskalduntzea eta Euskal Herriaren izaera errespetatuko duten edukiak eta ezagutzak izatea. «Euskal ikasleok gure izaera ukatzen duen egungo ereduak gainditu behar dugu, hitza hartu behar dugu, gure ekarpena zein izango den zehaztu behar dugu, eta horretarako antolatu dugu biltzarra».

Hain zuzen ere, biltzarra demokratikoa eta nazionala izango dela azpimarratu zuen Etxebarriak: «Demokratikoa, euskal ikasleriaren zabalasuna ordezkaturik egongo delako, eta nazionala, Euskal Herri osoko ikasle eta gazte taldeak izango direlako».



Ikasle eta gazte elkarteetako ordezkariak, atzoko aurkezpenean.

Eztabaidarako bederatzi gune

Biltzarra maiatzaren 7, 8 eta 9an izango da Agurainen, Araban. Talde antolatzaileek jadanik idatzi bat banatu dute ikastetxe eta fakultateetan, eta bakoitzak bere ekarpena egin ahal izango du biltzarrerako.

Horren ondoren, biltzarrean eztabaidatzen hasiko dira, zortzi gune edo lan taldeetan: Unibertsitatea euskalduntzearen inguruko gunea; Lanbide Heziketa euskalduntzearen inguruko gunea; erdal ereduaren inguruko gunea; erdal edukien gainea; irakaskuntza ertain euskaldunaren gainea; aldizkariaren gainea; eta ikastetxe «txukunen» inguruko gunea, alegia, talde antolatzailearen ustez euskalduntzearen eta bertako edukiak zabaltearen aldeko apustua egin duten ikastetxeen gunearen inguruko gunea.

Larunbat eta igandean gune bakoitzak bere egoera berezia aztertu eta ondorioak aterako ditu, eta, gero, oro har, Euskal Ikasleon Erronken Taula Nazionala osatuko dute.

Taula horretan, euskal

ikasleok aurre begira alor bakoitzean eman beharreko pausoak zehaztuko dituzte. Hala ere, biltzarrean parte hartuko ez duten ikasleek aukera izango dute taulari ekarpenak egiteko. Izan ere, biltzarraren ondoren, hausnarketa egun nazional bat antolatuko dute ikastetxe guztietan, erronken taula eztabaidatzeko.

Eztabaidez gain, hitzaldiak, kontzertuak, bazkariak eta bestelako ekitaldiak izango dira hiru egunetan. Aurreko Euskal Ikasleon II. Biltzarra Leitzaan egin zuten, 1997an.

Altsasu, Olazti eta Ziordiko 1.600 bat umeri meningitisaren aurkako txertoa jarriko diete

■ Otsailetik hona hiru kasu atzeman dituzte inguru horretan

Europa Press / Iruñea

ALTSASU, Ziordia eta Olaztiko 1.600 bat umeri C meningitisaren kontrako txertoa jarriko diete ondorengo egunetan, Osasunbideak jakinarazi duenez. Izan ere, aurtengo otsailetik hiru umek hori izan dute gaitz, eta horrek alarma eragin du.

Azken kasua joan den igandean berean atzeman zuten; Iruñean bizi den 13 urteko haur bati atzeman zioten meningitisa. Haur horrek Nafarroako hiru-buruan ikasten du, eta Altsasura itzultzen da asteburuetan. Haren ikas-kideei dagoeneko jarri diete txertoa.

Nafarroako Gobernuak Larrialdi eta Epidemiologi Kontrolerako sailburu Aurelio Barrikartek azaldu zuenez, atzotik, aste-beteko epean, haur hezkuntzako eta hiru urtez azpitiko ume guztiei jarriko diete txertoa. Ondorengo astean, berri, Derrigorrezko Bigarren Hezkuntzako, Batxilergoko eta Lanbide Heziketako ikasleei jarriko diete. Guztira, 1.200.000 pezetak gastatuko dute. Barrikarteren ustez, biztalen gutxiko inguru batean hiru kasu izateak justifikatzen du kanpaina.

Hiru urte arteko haurren hezkuntzaren diagnosia egin dezan eskatu dio Legebiltzarrak Eusko Jaurlaritzaritzari

■ Adin epe horretako hezkuntza koordinatzeko borondatea berretsi zuen atzo Iñaxio Oliveri sailburuak

Europa Press / Gasteiz

EUSKO LEGEBILTZARREKO Hezkuntza Batzordeak legez besteko proposamen bat onartu zuen atzo, zeinak Hezkuntza Sailari eskatzen dion instituzio arteko batzorde bat era dezan hiru urte arteko haurren hezkuntzaren diagnosia egiteko.

Ekimena Isabel Celaa PSE-EEko ordezkariak aurkeztu zuen, eta aho batez onartu zuten batzordekide guztiek.

Legez besteko proposamen horrek zortzi hilabeteko epea ematen dio Jaurlaritzari batzordea osatu eta haren azterketa Parlamentuaren aurrean aurkez dezan. Txostenak herriz herriko egoera aztertu beharko du eta hiru urte bitarteko hezkuntzaren finantzaketa eta kalitatea garantizatzeke neurriak proposatu beharko ditu.

Celaa proposamena justifikatzerakoan azaldu zuenez, gizartean oso zabaldua dago

haur horiek beren adinari dagokion hezkuntza jasotzen ez dutelako ustea. Hori hala dela ziurtatuko balitz, Celaak uste du azkar zuzendu beharko litzatekeela egoera, «haurren bilakaera akademikoa baldintza dezake-eta».

Arazo horrezaz gain, baina, bada larritzeko moduko beste bat: eskola horien finantzaketa. Txomin Aurrekoetxea ordezkari jeltzaleak gogoratu zuenez, adin horretako haurren hezkuntza eskaini-

tzen duten eskolentzat 180 milioi pezetak jartzen dituzte Eusko Jaurlaritzak eta diputazioek, «eta hori ez da aski, inonik ere».

Inaxio Oliveri Hezkuntza sailburuak argudio horiek onartu zituen, eta azpimarratu Jaurlaritzak baduela borondatea adin epe horretarako hezkuntza koordinatzeko. Halaber, hitzeman zuen sektorea arautzeko proposamenak urtea amaitu baino lehen aurkeztuko dituela.